

।रुद्रम्।

॥श्री रुद्रप्रश्नः॥

॥श्री गुरुभ्यो नमः हरिः ओम्॥
— — — —

॥लघुन्यासः॥

ओं अथात्मानं शिवात्मानं श्री रुद्ररूपं ध्यायेत्॥

शुद्धस्फटिकसङ्काशं त्रिनेत्रं पञ्चवक्त्रकम्।

गङ्गाधरं दशभुजं सर्वाभरणभूषितम्॥

नीलग्रीवं शशाङ्काङ्कं नागयज्ञोपवीतिनम्।

व्याघ्रचर्मोत्तरीयं च वरेण्यं अभयप्रदम्॥

कमण्डल्वक्षसूत्राणां धारिणं शूलपाणिनम्।

ज्वलन्तं पिङ्गलजटा शिखामुद्योतधारिणम्॥

वृषस्कन्ध समारूढं उमादेहार्ध धारिणम्।
अमृतेनाप्लुतं शान्तं दिव्यभोग समन्वितम्॥

दिग्देवतासमायुक्तं सुरासुरनमस्कृतम्।
नित्यं च शाश्वतं शुद्धं ध्रुवमक्षरमव्ययम्॥

सर्वव्यापिनमीशानं रुद्रं वै विश्वरूपिणम्।
एवं ध्यात्वा द्विजस्सम्यक् ततो यजनमारभेत्॥

अथातो रुद्रस्नानार्चनाभिषेकविधिं व्याख्यास्यामः॥

आदित एव तीर्थे स्नात्वा उदेत्य शुचिः

प्रयतो ब्रह्मचारी शुक्लवासा देवाभिमुख स्थित्वा

आत्मनि देवता स्स्थापयेत्।

प्रजनने ब्रह्मा तिष्ठतु।

पादयोर् विष्णुस्तिष्ठतु।

हस्तयोर् हरस्तिष्ठतु।

बाह्वोर् इन्द्रस्तिष्ठतु।

जठरे अग्निस्तिष्ठतु।

हृदये शिवस्तिष्ठतु।

कण्ठे वसव स्तिष्ठन्तु।

वक्त्रे सरस्वती तिष्ठतु।

नासिकयोर् वायुस्तिष्ठतु।

नयनयोश्चन्द्रादित्यौ तिष्ठेताम्।

कर्णयोर् अश्विनौ तिष्ठेताम्।

ललाटे रुद्रास्तिष्ठन्तु।

मू॒र्ध्न्यादि॑त्यास्तिष्ठन्तु।

शि॒रसि॑ म॒हादे॒वस्तिष्ठ॑तु।

शि॒खायां॑ वा॒मदे॒वस्तिष्ठ॑तु।

पृ॒ष्ठे पि॒नाकी॑ तिष्ठतु।

पु॒रत॑ शूली तिष्ठतु।

पा॒र्श्वयो॑ शि॒वाशङ्क॑रौ तिष्ठेताम्।

सर्व॑तो वा॒युस्तिष्ठ॑तु।

ततो॑ ब॒हि स्सर्व॑तोऽग्नि॒र्ज्वाला॑मा॒ला-प॑रिवृतः तिष्ठतु।

सर्वे॑ष्वङ्गेषु सर्वा॑ दे॒वता॑ यथा॒स्थानं॑ तिष्ठन्तु।

मा॒गं र॑क्षन्तु।

सर्वा॑न् म॒हा ज॑नान् रक्षन्तु।

अ॒ग्नि॒र्मे वा॒चि श्रि॑तः। वा॒घृद॑ये।

हृ॒दयं॑ म॒यि। अ॒हम॑मृ॒ते॑। अ॒मृतं॑ ब्र॒ह्म॑णि।

वा॒युर्मे॑ प्रा॒णो श्रि॒तः। प्रा॒णो हृ॒दये॑।
हृ॒दयं॑ म॒यि। अ॒हम॒मृते॑॥ अ॒मृतं॑ ब्र॒ह्मणि॑।

सू॒र्यो मे॑ चक्षु॒षि श्रि॒तः। चक्षु॑र्हृ॒दये॑।
हृ॒दयं॑ म॒यि। अ॒हम॒मृते॑॥ अ॒मृतं॑ ब्र॒ह्मणि॑।

च॒न्द्रमा॑ मे॒ मन॑सि श्रि॒तः। मनो॑ हृ॒दये॑।
हृ॒दयं॑ म॒यि। अ॒हम॒मृते॑॥ अ॒मृतं॑ ब्र॒ह्मणि॑।

दि॒शो मे॑ श्रो॒त्रे श्रि॒ताः। श्रो॒त्रं हृ॒दये॑।
हृ॒दयं॑ म॒यि। अ॒हम॒मृते॑॥ अ॒मृतं॑ ब्र॒ह्मणि॑।

आ॒पो मे॑ रे॒तसि॑ श्रि॒ताः। रे॒तो हृ॒दये॑।

हृ॒दयं॑ म॒यि। अ॒हम॑मृ॒ते॑॥ अ॒मृतं॑ ब्र॒ह्म॑णि।

पृ॒थि॒वी मे॑ शरी॒रे श्रि॑ता। शरी॒र॒गं हृ॑दये।
हृ॒दयं॑ म॒यि। अ॒हम॑मृ॒ते॑॥ अ॒मृतं॑ ब्र॒ह्म॑णि।

ओष॑धिवनस्प॒तयो॑ मे लो॒म॒सु श्रि॑ताः। लो॒मा॒नि हृ॑दये।
हृ॒दयं॑ म॒यि। अ॒हम॑मृ॒ते॑॥ अ॒मृतं॑ ब्र॒ह्म॑णि।

इन्द्रो॑ मे ब॒लै श्रि॑तः। ब॒ल॒गं हृ॑दये।
हृ॒दयं॑ म॒यि। अ॒हम॑मृ॒ते॑॥ अ॒मृतं॑ ब्र॒ह्म॑णि।

पर्ज॑न्यो मे मू॒र्ध्नि श्रि॑तः। मू॒र्धा हृ॑दये।
हृ॒दयं॑ म॒यि। अ॒हम॑मृ॒ते॑॥ अ॒मृतं॑ ब्र॒ह्म॑णि।

ई॒शा॒नो मे॑ म॒न्यौ श्रि॒तः। म॒न्युर्हृ॒दये॑।
हृ॒दयं॑ म॒यि। अ॒हम॒मृते॑॥ अ॒मृतं॑ ब्र॒ह्मणि॑।

आ॒त्मा म॑ आ॒त्मनि॑ श्रि॒तः। आ॒त्मा हृ॒दये॑।
हृ॒दयं॑ म॒यि। अ॒हम॒मृते॑॥ अ॒मृतं॑ ब्र॒ह्मणि॑।

पुन॑र्म आ॒त्मा पुन॑रायु॒रागात्॑॥ पुनः॑ प्रा॒णः पुन॑राकू॒तमा॑गात्॑॥

वै॒श्वान॑रो र॒श्मिभि॑र्वावृ॒धानः॑।
अ॒न्तस्ति॑ष्ठ॒त्वमृ॑तस्य गो॒पाः।

अस्य॑ श्री रु॒द्राध्या॑य प्र॒श्न म॑हा मन्त्रस्या।

अ॒घोर॑ ऋ॒षिः। अ॒नुष्टु॑प् छन्दः।

सङ्कर्ष॑णमूर्ति स्वरूपो योसावादित्यः

परम पुरुष स्स एष रुद्रो देवता।

नमश्शिवायेति बीजम्।

शिवतरायेति शक्तिः।

महा देवायेति कीलकम्।

श्री सांब सदाशिव प्रसाद सिद्धर्थे जपे विनियोगः॥

ओं अग्निहोत्रात्मने अङ्गुष्ठाभ्यां नमः।

दर्श पूर्ण मासात्मने तर्जनीभ्यां नमः।

चातुर्मास्यात्मने मध्यमाभ्यां नमः।

निरूढ पशुबन्धात्मने अनामिकाभ्यां नमः।

ज्योतिष्ठो मात्मने कनिष्ठिकाभ्यां नमः।

सर्व क्रत्वात्मने करतलकरपृष्ठाभ्यां नमः।

अग्निहोत्रात्मने हृदयाय नमः।

दर्श पूर्ण मासात्मने शिरसे स्वाहा।

चातुर्मास्यात्मने शिखायै वषट्।

निरूढ पशुबन्धात्मने कवचायहुम्।

ज्योतिष्ठो मात्मने नेत्रत्रयाय वौषट्।

सर्व क्रत्वात्मने अस्त्राय फट्।

भूर्बुव स्सुवरोमिति दिग्भन्धः।

ध्यानम्

आपाताळ नभः स्थलान्तः भुवनं ब्रह्माण्डमावि स्फुरत्

ज्योतिः स्फाटिकं लिङ्गं मौलिं विलसत् पूर्णेन्दुं वान्तामृतैः।

अस्तोकाप्लुतं मेकमीशं मनिशं रुद्रानुवाकं जपन्

ध्याये दीप्सितं सिद्धये ध्रुवपदं विप्रोभिषिञ्चेच्छिवम्॥

ब्रह्माण्डं व्याप्तं देहाभसितं हिमरुचाभासमानाभुजङ्गैः

कण्ठे कालाः कपर्दा कलितशशिकलाश्चण्डकोदण्डहस्ताः।

त्र्यक्षा रुद्राक्ष मालाः प्रकटितविभवा इशांभवा मूर्तिभेदाः

रुद्रा इश्री रुद्रसूक्त प्रकटितविभवाः नः प्रयच्छन्तु सौख्यम्॥

ओम्॥ ग॒णानां॑ त्वा ग॒णप॑ति॒गं ह॒वाम॑हे क॒विं क॑वी॒नामु॑प॒मश्र॑वस्तमम्।
ज्ये॒ष्ठरा॒जं ब्र॑ह्म॒णां ब्र॑ह्म॒णस्प॑त आ न इ॒शृण्व॑न्नू॒तिभि॑स्सी॒द सा॑दनम्॥
महागणपतये नमः॥

॥शान्तिपाठः॥

शं च॑ मे म॒यश्च॑ मे
प्रि॒यं च॑ मेऽनु॒काम॑श्च मे का॒मश्च॑ मे
सौम॑नसश्च मे भ॒द्रं च॑ मे
श्रेय॑श्च मे व॒स्यश्च॑ मे
यश॑श्च मे भ॒गश्च॑ मे
द्र॒विणं॑ च मे य॒न्ता च॑ मे

ध॒र्ता च॑ मे॒ क्षे॒मश्च॑ मे॒
धृ॒तिश्च॑ मे॒ वि॒श्वं च॑ मे॒ मह॑श्च मे॒
सं॒वि॒च्च मे॒ ज्ञा॒त्रं च॑ मे॒
सू॒श्च मे॒ प्र॒सू॒श्च मे॒
सी॒रं च॑ मे॒ ल॒यश्च॑ म॒ ऋ॒तं च॑ मे॒ऽमृ॒तं च॑ मे॒
ऽय॒क्ष्मं च॑ मे॒ऽना॒म॒य॒च्च मे॒
जी॒वा॒तुश्च॑ मे॒ दी॒र्घा॒यु॒त्वं च॑ मे॒ऽन॒मि॒त्रं च॑ मे॒ऽभ॒यं च॑ मे॒
सु॒गं च॑ मे॒ श॒य॒नं च॑ मे॒
सू॒षा च॑ मे॒ सु॒दि॒नं च॑ मे॒॥
ओं शान्ति॑ शान्ति॑ शान्ति॑ः॥

॥श्री रुद्रप्रश्नः॥

॥ओं नमो भगवते रुद्राय॥

नमस्ते रुद्र मन्यव उतो त इषवे नमः।
नमस्ते अस्तु धन्वने बाहुभ्यामुत ते नमः॥

या त इषु शिवतमा शिवं बभूव ते धनुः।
शिवा शरव्या या तव तया नो रुद्र मृडया॥

या ते रुद्र शिवा तनूरघोराऽपापकाशिनी।
तया नस्तनुवा शन्तमया गिरिशन्ताऽभि चाकशीहि॥

यामिषुङ्गिरिशन्त हस्ते बिभर्ष्यस्तवे।

शि॒वाङ्गि॑रि॒त्र ताङ्क॑रु॒ मा हि॑गं॒सीः पु॑रु॒षञ्ज॑गत्॥

शि॒वेन॑ वच॒सा त्वा गि॑रि॒शाऽच्छा॑ वदाम॒सि।
यथा॑ न॒ स्सर्व॑मि॒ज्जग॑दय॒क्ष्मगं॑ सु॒मना॑ असत्॥

अ॒ध्यवो॑चदधिवक्ता प्रथ॒मो दै॒व्यो भि॑षक्।
अ॒हीग्श्च॑ सर्वा॒ञ्जम्भ॑यन्त्सर्वा॒श्च या॑तु॒धान्यः॥

असौ॑ यस्ता॒म्रो अ॒रुण॑ उत ब॒भ्रु स्सु॑म॒ङ्गलः॑।
ये चे॒मागं॑ रु॒द्रा अ॒भितो॑ दि॒क्षु
श्रि॒ता स्स॑हस्र॒शोऽवै॑षा॒गं हे॒ड ई॑महे॥

असौ॑ योऽव॒सर्प॑ति नील॒ग्रीवो॑ विलो॒हितः॑।
उ॒तैन॑ङ्गोपा अ॒दृश॑न्नदृ॒शन्नु॑दहार्यः॥

उ॒तैनं॑ वि॒श्वा भू॒तानि॑ स दृ॒ष्टो मृ॑डयाति नः॥

नमो॑ अस्तु नील॑ग्रीवाय सह॑स्राक्षाय मी॒ढुषे॑॥
अथो॑ ये अस्य॑ सत्वानो॑ऽहन्ते॒भ्योऽकर॑न्नमः॥

प्रमु॑ञ्च धन्व॑नस्त्वमु॒भयो॑रर्नियो॒ज्याम्।
याश्च॑ ते हस्त॑ इष॒वः परा॑ ता भग॒वो वप॑॥

अव॑तत्य धनु॑स्त्वग्ं सह॑स्राक्ष शते॑षुधे।
निशी॑र्य श॒ल्यानां॑ मुखा॑ शिवो॑ न स्सु॒मना॑ भव॥

विज्य॑न्धनुः कप॑र्दिनो वि॒शल्यो॑ बा॒णवाग्ं॑ उ॒ता।
अने॑शन्नस्ये॒षव आ॒भुर॑स्य निष॒ङ्गथिः॑॥

या ते हे॒ति॒र्मी॒दुष्ट॒म ह॒स्ते ब॒भूव॑ ते॒ धनुः॑।
तया॑ऽस्मान् वि॒श्वत॑स्त्वम॒यक्ष्म॒या परि॑भुज॥

नम॑स्ते अ॒स्त्वायु॑धायाऽना॒तताय॑ धृ॒ष्णवे॑॥
उ॒भाभ्या॑मु॒त ते नमो॑ बा॒हुभ्या॑न्तव॒ धन्व॑ने॥

परि॑ ते॒ धन्व॑नो हे॒तिर॒स्मान् वृ॑णक्तु वि॒श्वतः॑।
अथो॒ य इ॒षुधि॑स्तवाऽऽरे अ॒स्मन्नि धे॑हि तम्॥

नम॑स्ते अस्तु भगवन् वि॒श्वेश्व॑राय
महा॑दे॒वाय त्र॑यम्ब॒काय त्रि॑पुरा॒न्तकाय॑
त्रिका॑ग्नि॒काला॑य का॒लाग्नि॑रु॒द्राय नी॒लक॑ण्ठाय
मृ॒त्युञ्ज॑याय स॒र्वेश्व॑राय सदा॒शिवाय॑
श्रीम॑न्महादे॒वाय नमः॑॥[१]

नमो॑ हिर॑ण्यबा॒हवे॑ से॒नान्ये॑ दि॒शां च॑ पतये॑ नमो॑
नमो॑ वृ॒क्षेभ्यो॑ हरि॑केशेभ्यः पशू॒नां पतये॑ नमो॑
नम॑ स्स॒स्पिञ्ज॑राय त्विषी॑मते पथी॒नां पतये॑ नमो॑
नमो॑ ब॒भ्लु॒शाय॑ वि॒व्याधि॑नेऽन्ना॒नां पतये॑ नमो॑
नमो॑ हरि॑केशायोपवी॒तिने॑ पु॒ष्टा॒नां पतये॑ नमो॑
नमो॑ भव॒स्य हे॒त्यै जग॑तां पतये॑ नमो॑
नमो॑ रु॒द्रायाऽऽत॑ताविने॒ क्षेत्रा॑णां पतये॑ नमो॑
नम॑ स्सू॒तायाऽह॑न्त्याय वना॒नां पतये॑ नमो॑
नमो॑ रोहि॒ताय॑ स्थपतये॒ वृक्षा॑णां पतये॑ नमो॑
नमो॑ मन्त्रि॑णे वाणिजाय॒ कक्षा॑णां पतये॑ नमो॑
नमो॑ भुव॒न्तये॑ वारि॒वस्कृ॑तायौषधी॒नां पतये॑ नमो॑
नम॑ उच्चै॒र्घोषा॑याऽऽक्र॒न्दय॑ते पत्ती॒नां पतये॑ नमो॑
नमः॑ कृ॒त्स्नवी॑ताय धाव॒ते स॒त्वनां॑ पतये॑ नमः॑॥[२]

नम॑ स्सह॑मानाय॑ नि॒व्याधि॑न॒ आव्या॑धिनी॒नां पत॑ये नमो॒
 नमः॑ ककु॒भाय॑ नि॒षङ्गि॑णो॒ स्तेना॑नां पतये नमो॒
 नमो॑ नि॒षङ्गि॑ण इ॒षुधि॑मते॒ तस्करा॑णां पतये नमो॒
 नमो॑ वज्र॒चते॑ परि॒वज्र॑चते॒ स्तायू॑नां पतये नमो॒
 नमो॑ नि॒चेर॑वे॒ परि॒चरा॑याऽर॒ण्यानां॑ पतये नमो॒
 नम॑ स्सृ॒कावि॑भ्यो॒ जिघा॑ग्स॒द्भ्यो मु॑ष्णतां पतये नमो॒
 नमो॑ ऽसि॒मद्भ्यो॒ नक्त॑ञ्चर॒द्भ्यः प्र॑कृ॒न्तानां॑ पतये नमो॒
 नम॑ उ॒ष्णीषि॑ने॒ गिरि॑चराय॒ कुलु॑ञ्चानां पतये नमो॒
 नम॑ इ॒षुम॑द्भ्यो॒ धन्वा॑वि॒भ्यश्च॑ वो नमो॒
 नम॑ आ॒तन्वा॑ने॒भ्य प्र॑ति॒दधा॑ने॒भ्यश्च॑ वो नमो॒
 नम॑ आ॒यच्छ॑द्भ्यो॒ विसृ॑ज॒द्भ्यश्च॑ वो नमो॒
 नमो॑ ऽस्य॑द्भ्यो॒ विध्य॑द्भ्यश्च॒ वो नमो॒
 नम॑ आ॒सीने॑भ्य॒ इशा॑याने॒भ्यश्च॑ वो नमो॒

नम॑ स्स्वपद्भ्यो॒ जाग्रद्भ्यश्च॑ वो॒ नमो॑
नम॑ स्तिष्ठद्भ्यो॒ धावद्भ्यश्च॑ वो॒ नमो॑
नम॑ स्सभाभ्य॒ स्सभापतिभ्यश्च॑ वो॒ नमो॑
नमो॑ अश्वेभ्योऽश्वपतिभ्यश्च॑ वो॒ नमः॥[३]

नम॑ आव्याधिनी॑भ्यो॒ विविध्यन्तीभ्यश्च॑ वो॒ नमो॑
नम॑ उगणाभ्यस्तृग्ं॒हतीभ्यश्च॑ वो॒ नमो॑
नमो॑ गृथ्सेभ्यो॒ गृथ्सपतिभ्यश्च॑ वो॒ नमो॑
नमो॑ व्रातै॑भ्यो॒ व्रातपतिभ्यश्च॑ वो॒ नमो॑
नमो॑ गणेभ्यो॒ गणपतिभ्यश्च॑ वो॒ नमो॑
नमो॑ विरूपेभ्यो॒ विश्वरूपेभ्यश्च॑ वो॒ नमो॑
नमो॑ महद्भ्यः॒ क्षुल्लकेभ्यश्च॑ वो॒ नमो॑
नमो॑ रथिभ्योऽरथेभ्यश्च॑ वो॒ नमो॑
नमो॑ रथै॑भ्यो॒ रथपतिभ्यश्च॑ वो॒ नमो॑

नम॑ स्से॒ना॒भ्य॑ स्से॒ना॒नि॒भ्य॑श्च॒ वो॒ नमो॑
 नमः॑, क्ष॒त्तृ॒भ्य॑ स्स॒ङ्ग्र॒ही॒तृ॒भ्य॑श्च॒ वो॒ नमो॑
 नम॑ स्त॒क्ष॒भ्यो॑ रथ॒का॒रे॒भ्य॑श्च॒ वो॒ नमो॑
 नमः॑ कु॒ला॒ले॒भ्यः॑ क॒म॒रि॒भ्य॑श्च॒ वो॒ नमो॑
 नमः॑ पु॒ज्जि॒ष्टे॒भ्यो॑ नि॒षा॒दे॒भ्य॑श्च॒ वो॒ नमो॑
 नम॑ इ॒षु॒कृ॒द्भ्यो॑ ध॒न्व॒कृ॒द्भ्य॑श्च॒ वो॒ नमो॑
 नमो॑ मृ॒ग॒यु॒भ्य॑ इ॒श्व॒नि॒भ्य॑श्च॒ वो॒ नमो॑
 नम॑ इ॒श्व॒भ्य॑ इ॒श्व॒प॒ति॒भ्य॑श्च॒ वो॒ नमः॑॥[४]

नमो॑ भ॒वा॒य॑ च॒ रु॒द्रा॒य॑ च
 नम॑ इ॒श॒र्वा॒य॑ च॒ प॒शु॒प॒त॒ये॑ च
 नमो॑ नी॒ल॒ग्री॒वा॒य॑ च॒ शि॒ति॒क॒ण्ठा॒य॑ च
 नमः॑ क॒प॒र्दि॒ने॑ च॒ व्यु॒प्त॒के॒शा॒य॑ च
 नम॑ स्स॒ह॒स्रा॒क्षा॒य॑ च॒ श॒त॒ध॒न्व॒ने॑ च

नमो॑ गिरि॒शाय॑ च शि॒पिवि॒ष्टाय॑ च
नमो॑ मी॒ढुष्ट॑माय॒ चेषु॑मते च
नमो॑ ह्र॒स्वाय॑ च वा॒मनाय॑ च
नमो॑ बृ॒हते॑ च वर्षी॑यसे च
नमो॑ वृ॒द्धाय॑ च सं॒वृद्ध॑ने च
नमो॑ अ॒ग्रियाय॑ च प्र॒थमाय॑ च
नमो॑ आ॒शवे॑ चाऽजि॒राय॑ च
नमो॑ इ॒शीघ्रि॑याय च शी॒भ्याय॑ च
नमो॑ ऊ॒र्म्याय॑ चाऽव॒स्वन्याय॑ च
नमो॑ स्प्रो॒तस्याय॑ च द्वी॒प्याय॑ च॥[५]

नमो॑ ज्ये॒ष्ठाय॑ च कनि॒ष्ठाय॑ च
नमो॑ पूर्॒वजाय॑ चाऽपर॒जाय॑ च
नमो॑ म॒ध्यमाय॑ चाऽप॒गल्भाय॑ च

नमो॑ ज॒घ॒न्याय॑ च॒ बु॒ध्नि॑याय च॒
 नम॑ स्सो॒भ्याय॑ च॒ प्र॒ति॒स॒र्याय॑ च॒
 नमो॑ या॒म्याय॑ च॒ क्षे॒म्याय॑ च॒
 नम॑ उ॒र्व॒र्याय॑ च॒ ख॒ल्याय॑ च॒
 नम॑ इ॒श्लो॒क्याय॑ च॒ अ॒व॒सान्याय॑ च॒
 नमो॑ व॒न्याय॑ च॒ क॒क्ष्याय॑ च॒
 नम॑ इ॒श्रवाय॑ च॒ प्र॒ति॒श्रवाय॑ च॒
 नम॑ आ॒शु॒षे॒णाय॑ च॒ अ॒शु॒र॒थाय॑ च॒
 नम॑ इ॒शू॒राय॑ च॒ अ॒व॒भि॒न्दते॑ च॒
 नमो॑ वर्मि॒णे च॒ व॒रू॒थि॒ने च॒
 नमो॑ बि॒ल्मि॒ने च॒ क॒व॒चि॒ने च॒
 नम॑ इ॒श्रु॒ताय॑ च॒ श्रु॒त॒से॒नाय॑ च॥[६]

नमो॑ दु॒न्दु॒भ्याय॑ च॒ अ॒ह॒न॒न्याय॑ च॒

नमो॑ धृ॒ष्णवे॑ च प्रमृ॒शाय॑ च
नमो॑ दू॒ताय॑ च प्रहि॒ताय॑ च
नमो॑ निष॒ङ्गिणे॑ चेषु॒धिमते॑ च
नम॑स्तीक्ष्णो॒षवे॑ चाऽऽयु॒धिने॑ च
नम॑ स्स्वायु॒धाय॑ च सु॒धन्वने॑ च
नम॑ स्सु॒त्याय॑ च पथ्याय॑ च
नमः॑ का॒त्याय॑ च नी॒प्याय॑ च
नम॑ स्सू॒द्याय॑ च सर॒स्याय॑ च
नमो॑ ना॒द्याय॑ च वैश॒न्ताय॑ च
नमः॑ कू॒प्याय॑ चाऽऽव॒त्याय॑ च
नमो॑ वर्ष्पा॒य चाऽऽवर्ष्पा॒य च
नमो॑ मे॒घ्याय॑ च वि॒द्युत्याय॑ च
नम॑ ई॒ध्रियाय॑ चाऽऽत॒प्याय॑ च
नमो॑ वा॒त्याय॑ च रे॒ष्मियाय॑ च

नमो॑ वास्त॒व्याय॑ च वास्तु॒पाय॑ च॥[७]

नम॑ स्सो॒माय॑ च रु॒द्राय॑ च
नम॑ स्ता॒म्राय॑ च ऽरु॒णाय॑ च
नम॑ श॒ङ्गाय॑ च प॒शुप॑तये च
नम॑ उ॒ग्राय॑ च भी॒माय॑ च
नमो॑ अ॒ग्रेव॑धाय च दू॒रेव॑धाय च
नमो॑ ह॒न्त्रे च ह॑नीयसे च
नमो॑ वृ॒क्षेभ्यो॑ ह॒रिके॑शेभ्यो
नम॑ स्ता॒राय॑
नम॑ श॒शंभ॑वे च म॒योभ॑वे च
नम॑ श॒ङ्क॒राय॑ च म॒यस्क॑राय च
नम॑ शि॒वाय॑ च शि॒वत॑राय च
नम॑ स्ती॒र्थ्याय॑ च कू॒ल्याय॑ च

नमः॑ पा॒र्या॑य चा॒ऽवा॒र्या॑य च
नमः॑ प्र॒तर॑णाय चो॒त्तर॑णाय च
नम॑ आ॒ता॒र्या॑य चा॒ऽऽला॑द्याय च
नम॑ इ॒श॒ष्या॑य च फे॒न्या॑य च
नम॑ स्मि॒क॒त्या॑य च प्र॒वा॒ह्या॑य च॥[८]

नम॑ इ॒रि॒ण्या॑य च प्र॒प॒थ्या॑य च
नमः॑ कि॒गं॒शि॒ला॑य च क्ष॒य॒णा॑य च
नमः॑ क॒प॒र्दि॒ने॑ च पु॒ल॒स्त॒ये॑ च
नमो॑ गो॒ष्ठा॑य च गृ॒ह्या॑य च
नम॑ स्त॒ल्क्या॑य च गे॒ह्या॑य च
नमः॑ का॒त्या॑य च ग॒ह्व॒रे॒ष्ठा॑य च
नमो॑ हृ॒द॒य्या॑य च नि॒वे॒ष्या॑य च
नमः॑ पा॒गं॒स॒व्या॑य च र॒ज॒स्या॑य च

नम॑ इ॒शु॒ष्क्या॑य च॒ हरि॑त्याय च
नमो॑ लो॒प्या॑य चो॒ल॒प्या॑य च
नम॑ ऊ॒र्व्या॑य च सू॒र्म्या॑य च
नमः॑ प॒र्ण्या॑य च प॒र्ण॒श॒द्या॑य च
नमो॑ ऽप॒गु॒रमा॑णाय चा॒भि॒घ्न॒ते च
नम॑ आ॒खि॒वद॑ते च प्र॒खि॒वद॑ते च
नमो॑ वः कि॒रि॒के॒भ्यो॑ दे॒वा॒ना॒ग्ं हृ॒दये॑भ्यो
नमो॑ वि॒क्षी॒णके॑भ्यो नमो॑ वि॒चि॒न्व॒त्के॑भ्यो
नम॑ आ॒नि॒र्ह॒ते॒भ्यो॑ नम॑ आ॒मी॒व॒त्के॑भ्यः॥[९]

द्रा॒पे अ॒न्ध॒स॒स्प॒ते द॒रि॒द्र॒न्नी॒ल॒लो॒हि॒ता॑
ए॒षां पु॒रु॒षा॒णामे॑षां प॒शू॒नां
मा भे॒र्मा॒ऽरो॒ मो ए॒षां कि॒ञ्च॒ना॒ऽम॑मत्॥

या ते॑ रु॒द्र शि॒वा त॒नू शि॒वा वि॒श्वाह॑ भेष॒जी।

शि॒वा रु॒द्रस्य॑ भेष॒जी तया॑ नो मृ॒ड जी॒वसे॑॥

इ॒माग्ं रु॒द्राय॑ तव॒से क॒पर्दि॑ने॒ क्षय॑द्वी॒राय॑ प्र॒भराम॑हे म॒तिम्॥

यथा॑ न॒ श॒मस॑दि॒द्वप॑दे चतु॒ष्पदे॑ वि॒श्वं पु॒ष्टं ग्रा॑मे अ॒स्मिन्न॑ना॒तुरम्॥

मृ॒डा नो॑ रु॒द्रोत॑ नो म॒यस्कृ॑धि क्षय॑द्वी॒राय॑ नम॒सा वि॑धेम ते।

यच्छं॑ च योश्च॑ म॒नुरा॑य॒जे पि॒ता तद॑श्याम॒ तव॑ रु॒द्र प्र॑णी॒तौ॥

मा नो॑ म॒हान्त॑मु॒त मा नो॑ अ॒र्भकं॑ मा न॒ उक्ष॑न्तमु॒त मा न॑ उ॒क्षित॑म्।

मा नो॑ऽव॒धीः पि॒तरं॑ मोत॒ मा॒तरं॑ प्रि॒या मा न॑स्त॒नुवो॑ रु॒द्र री॑रिषः॥

मा न॑स्तो॒के त॑नये॒ मा न॑ आ॒युषि॑ मा नो॒ गोषु॑ मा नो॒ अश्वे॑षु रीरिषः।

वी॒रान्मा॑ नो रु॒द्र भा॑मि॒तोऽव॑धीर्ह॒विष्म॑न्तो नम॒सा वि॑धेम ते॥

आ॒रा॒त्ते॒ गो॒घ्न॒ उ॒त पू॒रु॒ष॒घ्ने॒ क्ष॒य॒द्वी॒रा॒य सु॒म्न॒म॒स्मे ते॑ अ॒स्तु।
र॒क्षा च॒ नो अ॒धि च॒ दे॒व ब्रू॒ह॒धा च॒ न र॒श्मि॒ यच्छ॒ द्वि॒र्हः॑॥

स्तु॒हि श्रु॒तं ग॒र्त॒सदं॒ यु॒वा॒नं मृ॒ग॒न्न भी॒ममु॒प॒ह॒नु॒मु॒ग्रम्।
मृ॒डा ज॒रि॒त्रे रु॒द्र स्त॒वा॒नो अ॒न्य॒न्ते अ॒स्मन्नि॒व॒प॒न्तु से॒नाः॑॥

प॒रि॒णो रु॒द्रस्य॑ हे॒ति॒र्वृ॒ण॒क्तु॒ परि॒ त्वे॒ष॒स्य दु॒र्म॒ति॒र॒घा॒योः।
अ॒व स्ति॒रा म॒घ॒वद्भ्य॑स्त॒नुष्व॒ मी॒ढ्व॒स्तो॒काय॒ तन॑याय मृ॒डय॑॥

मी॒ढु॒ष्ट॒म शि॒व॒त॒म शि॒वो न॑ स्सु॒म॒ना भ॒व।
प॒र॒मे वृ॒क्ष आ॒यु॒ध॒न्नि॒धाय॑ कृ॒त्तिं व॒सान॑ आ॒च॒र पि॒ना॒कं बि॒भ्र॒दा॒ग॒हि॑॥

वि॒कि॒रि॒द वि॒लो॒हि॒त न॑म॒स्ते अ॒स्तु भ॒ग॒वः॑।

यास्ते॑ स॒हस्र॑गं हे॒तयो॑ऽन्यमस्मन्नि॑ वप॒न्तु ताः॑॥

स॒हस्रा॑णि स॒हस्र॑धा बा॒हुवो॑स्तव हे॒तयः॑।
तासा॑मी॒शानो॑ भगवः प॒राची॑ना मु॒खा कृ॑धि॥[१०]

स॒हस्रा॑णि स॒हस्र॑शो ये रु॒द्रा अधि॑ भू॒म्याम्॑॥
तेषा॑गं स॒हस्र॑यो॒जने॑ऽव ध॒न्वानि॑ तन्मसि॥

अस्मिन्॑ म॒हत्य॑र्णवे॒ऽन्तरि॑क्षे भ॒वा अधि॑।
नील॑ग्री॒वा शि॑ति॒कण्ठा॑ श॒र्वा अधः॑, क्ष॒माच॑राः।
नील॑ग्री॒वा शि॑ति॒कण्ठा॑ दि॒वगं॑ रु॒द्रा उप॑श्रिताः।
ये वृ॒क्षेषु॑ स॒स्पिञ्ज॑रा नील॑ग्री॒वा विलो॑हिताः।
ये भू॒ताना॑मधि॒पत॑यो वि॒शिखा॑सः क॒पर्दिनः॑॥
ये अ॒न्नेषु॑ वि॒विध्य॑न्ति पा॒त्रेषु॑ पि॒बतो॑ ज॒नान्॑।

ये प॒थां प॒थिर॑क्षय॑ ऐ॒ल॒बृ॒दा य॒व्यु॒धः॑।
ये ती॒र्था॒नि प्र॒चर॑न्ति सृ॒का॒व॒न्तो नि॒षङ्गि॑णः।
य ए॒ता॒व॒न्तश्च॑ भू॒याग्ं॑सश्च दि॒शो रु॒द्रा वि॑त॒स्थि॒रे।
तेषा॑ग्ं स॒हस्र॑ऽयोज॒नेऽव॑ध॒न्वानि॑ तन्म॒सि॥

नमो॑ रु॒द्रेभ्यो॑ ये पृ॒थि॒व्यां यै॑ऽन्तरि॒क्षे
ये दि॒वि येषा॑म॒न्नं वा॒तो व॒र्षमि॑ष॒वस्ते॑भ्यो
द॒श प्रा॒चीर् द॒श द॒क्षि॒णा द॒श
प्र॒ती॒चीर् द॒शोदी॑चीर् द॒शोर्ध्वा॑स्तेभ्यो
नम॑स्ते नो मृ॒डय॑न्तु ते यं द्वि॒ष्मो
यश्च॑ नो द्वेष्टि॒ तं वो॒ जम्भे॑ द॒धामि॑॥[११]

त्र्य॑ंब॒कं य॒जाम॑हे सु॒गन्धिं॑ पु॒ष्टि॒व॒र्ध॒नम्।
उ॒र्वारु॑कमि॒व ब॑न्ध॒नान् मृ॒त्योर् मु॑क्षी॒य माऽमृ॑तात्॥

यो रु॒द्रो अ॒ग्नौ यो अ॒प्सु य ओष॑धीषु
यो रु॒द्रो वि॒श्वा भुव॑नाऽऽवि॒वेश
तस्मै॑ रु॒द्राय॑ नमो॑ अस्तु॥

तमु॑ष्टुहि॒ य स्वि॑षु स्सु॒धन्वा यो वि॒श्वस्य॑ क्षय॑ति भेष॒जस्य॑।
यक्ष्वा॑महे॒ सौम॑नसाय॒ रुद्रं॑ नमो॑भिर् देव॑मसुरं दुव॑स्य॥

अयं॑ मे ह॒स्तो भग॑वानयं॒ मे भग॑वत्तरः।
अयं॑ मे वि॒श्वभेष॑जोऽय॒गं शि॒वाभि॑मर्शनः॥

ये ते॑ स॒हस्र॑मयु॒तं पा॒शा मृ॒त्यो म॒र्त्याय॑ ह॒न्त॒वे।
तान् य॒ज्ञस्य॑ मा॒यया॑ सर्वा॒नव॑ य॒जामहे॑।
मृ॒त्यवे॑ स्वाहा॒ मृ॒त्यवे॑ स्वाहा॥

ओं नमो भगवते रुद्राय विष्णवे मृत्युर्मे पाहि॥

प्राणानां ग्रन्थिरसि रुद्रो मा विशान्तकः।

तेनान्नेनाप्यायस्व॥

नमो रुद्राय विष्णवे मृत्युर्मे पाहि॥

सदा शिवोम्॥

ओं शान्ति शान्ति शान्तिः॥

।चमकप्रश्नः॥

ओं अ॒ग॒ना॒वि॒ष्णू॒ स॒जो॒ष॒से॒मा॒ वर्ध॑न्तु॒ वा॒ङ्गि॒रः॑।
द्यु॒म्नै॒र्वा॒जे॒भि॒रा॒गत॑म्॥

वा॒जश्च॑ मे॒ प्र॒स॒वश्च॑ मे॒
प्र॒य॒तिश्च॑ मे॒ प्र॒सि॒तिश्च॑ मे॒
धी॒तिश्च॑ मे॒ क्र॒तुश्च॑ मे॒
स्व॒रश्च॑ मे॒ श्लो॒कश्च॑ मे॒
श्रा॒वश्च॑ मे॒ श्रु॒तिश्च॑ मे॒
ज्यो॒तिश्च॑ मे॒ सु॒वश्च॑ मे॒
प्रा॒णश्च॑ मे॒ऽपानश्च॑ मे॒
व्या॒नश्च॑ मे॒ऽसुश्च॑ मे॒
चि॒त्तं॑ च॒ म॒ आ॒धी॒तं॑ च॒ मे॒

वाक्च॑ मे॒ मनश्च॑ मे॒
चक्षु॑श्च मे॒ श्रोत्रं॑ च मे॒
दक्ष॑श्च मे॒ बलं॑ च म॒ ओजश्च॑ मे॒
सह॑श्च म॒ आयुश्च॑ मे॒
जरा॑ च म॒ आत्मा॑ च मे॒
तनू॑श्च मे॒ शर्म॑ च मे॒
वर्म॑ च मेऽङ्गानि॑ च मेऽस्थानि॑ च मे॒
परू॑र्ग्षि च मे॒ शरी॑राणि च मे॥[१]

ज्यैष्ठ्यं॑ च म॒ आधिप॑त्यं च मे॒
मन्यु॑श्च मे॒ भामश्च॑ मेऽमश्च॑ मेऽम्भश्च॑ मे॒
जेमा॑ च मे॒ महि॑मा च मे॒
वरि॑मा च मे॒ प्रथि॑मा च मे॒
वर्ष्मा॑ च मे॒ द्राघु॑या च मे॒

वृद्धं च मे वृद्धिश्च मे
सत्यं च मे श्रद्धा च मे
जगच्च मे धनं च मे
वशश्च मे त्विषिश्च मे
क्रीडा च मे मोदश्च मे
जातं च मे जनिष्यमाणं च मे
सूक्तं च मे सुकृतं च मे
वित्तं च मे वेद्यं च मे
भूतं च मे भविष्यच्च मे
सुगं च मे सुपथं च म
ऋद्धं च म ऋद्धिश्च मे
क्लुप्तं च मे क्लुप्तिश्च मे
मतिश्च मे सुमतिश्च मे॥[२]

शं॑ च॒ मे॒ म॒यश्च॑ मे॒
 प्रि॒यं च॒ मे॒ऽनु॒का॒मश्च॑ मे॒ का॒मश्च॑ मे॒
 सौ॒म॒न॒सश्च॑ मे॒ भ॒द्रं च॒ मे॒
 श्रे॒यश्च॑ मे॒ व॒स्यश्च॑ मे॒
 य॒शश्च॑ मे॒ भ॒गश्च॑ मे॒
 द्र॒वि॒णं च॒ मे॒ य॒न्ता च॒ मे॒
 ध॒र्ता च॒ मे॒ क्षे॒मश्च॑ मे॒
 धृ॒तिश्च॑ मे॒ वि॒श्वं च॒ मे॒ म॒हश्च॑ मे॒
 सं॒वि॒च्च॑ मे॒ ज्ञा॒त्रं च॒ मे॒
 सू॒श्च मे॒ प्र॒सू॒श्च मे॒
 सी॒रं च॒ मे॒ ल॒यश्च॑ म॒ ऋ॒तं च॒ मे॒ऽमृ॒तं च॒ मे॒
 ज्य॒क्ष्मं च॒ मे॒ऽना॒म॒यच्च॑ मे॒
 जी॒वा॒तुश्च॑ मे॒ दी॒र्घा॒यु॒त्वं च॒ मे॒ऽन॒मि॒त्रं च॒ मे॒ऽभ॒यं च॒ मे॒
 सु॒गं च॒ मे॒ श॒य॒नं च॒ मे॒

सू॒षा च॑ मे सु॒दि॒नं च॑ मे॥[३]

ऊ॒र्क्च॑ मे सू॒नृ॒ता च॑ मे
प॒यश्च॑ मे र॒सश्च॑ मे
घृ॒तं च॑ मे म॒धु च॑ मे
स॒ग्धिश्च॑ मे स॒पी॒तिश्च॑ मे
कृ॒षिश्च॑ मे वृ॒ष्टिश्च॑ मे
जै॒त्रं च॑ म औ॒द्भि॒द्यं च॑ मे
र॒यिश्च॑ मे रा॒यश्च॑ मे
पु॒ष्टं च॑ मे पु॒ष्टिश्च॑ मे
वि॒भु च॑ मे प्र॒भु च॑ मे
ब॒हु च॑ मे भू॒यश्च॑ मे
पू॒र्णं च॑ मे पू॒र्ण॒तरं॑ च॒ मेऽक्षि॑तिश्च॒ मे
कू॒य॒वाश्च॑ मेऽन्नं॑ च॒ मेऽक्षु॑च्च॒ मे

व्री॒हय॑श्च॒ मे॒ यवा॑श्च॒ मे॒ मा॒षा॑श्च॒ मे॒
ति॒ला॑श्च॒ मे॒ मु॒द्गा॑श्च॒ मे॒
ख॒ल्वा॑श्च॒ मे॒ गो॒धू॒मा॑श्च॒ मे॒
म॒सुरा॑श्च॒ मे॒ प्रि॒यङ्ग॑वश्च॒ मे॒ ऽण॑वश्च॒ मे॒
श्या॒मा॒का॑श्च॒ मे॒ नी॒वा॒रा॑श्च॒ मे॒॥[४]

अ॒श्मा॑ च॒ मे॒ मृ॒त्ति॒का॑ च॒ मे॒
गि॒रय॑श्च॒ मे॒ प॒र्व॒ता॑श्च॒ मे॒
सि॒क॒ता॑श्च॒ मे॒ वन॑स्प॒तय॑श्च॒ मे॒
हि॒र॒ण्यं॑ च॒ मे॒ ऽय॑श्च॒ मे॒
सी॒सं॑ च॒ मे॒ त्र॒पु॑श्च॒ मे॒
श्या॒मं॑ च॒ मे॒ लो॒हं॑ च॒ मे॒ ऽग्नि॑श्च॒ म॒ आ॒प॑श्च॒ मे॒
वी॒रु॒ध॑श्च॒ म॒ ओ॒ष॒ध॒य॑श्च॒ मे॒
कृ॒ष्ट॒प॒च्यं॑ च॒ मे॒ ऽकृ॒ष्ट॒प॒च्यं॑ च॒ मे॒

ग्रा॒म्याश्च॑ मे॒ प॒शव॑ आ॒रण्या॑श्च
य॒ज्ञेन॑ क॒ल्पन्तां॑
वि॒त्तं च॑ मे॒ वि॒त्तिश्च॑ मे
भू॒तं च॑ मे॒ भू॒तिश्च॑ मे
व॒सु च॑ मे॒ व॒सति॑श्च मे
क॒र्म च॑ मे॒ श॒क्तिश्च॑ मे॒ऽर्थश्च॑ मे
ए॒मश्च॑ मे॒ इ॒तिश्च॑ मे॒ ग॒तिश्च॑ मे॥[५]

अ॒ग्निश्च॑ मे॒ इ॒न्द्रश्च॑ मे
सो॒मश्च॑ मे॒ इ॒न्द्रश्च॑ मे
स॒विता॑ च॒ मे॒ इ॒न्द्रश्च॑ मे
स॒रस्व॑ती च॒ मे॒ इ॒न्द्रश्च॑ मे
पू॒षा च॑ मे॒ इ॒न्द्रश्च॑ मे
बृ॒हस्प॑तिश्च॒ मे॒ इ॒न्द्रश्च॑ मे

मित्रश्च॑ म॒ इन्द्रश्च॑ मे
वरुणश्च॑ म॒ इन्द्रश्च॑ मे
त्वष्टा॑ च॒ म॒ इन्द्रश्च॑ मे
धाता॑ च॒ म॒ इन्द्रश्च॑ मे
विष्णुश्च॑ म॒ इन्द्रश्च॑ मेऽश्विनौ॑ च॒ म॒ इन्द्रश्च॑ मे
मरुतश्च॑ म॒ इन्द्रश्च॑ मे
विश्वे॑ च॒ मे देवा॑ इन्द्रश्च॑ मे
पृथिवी॑ च॒ म॒ इन्द्रश्च॑ मेऽन्तरिक्षं॑ च॒ म॒ इन्द्रश्च॑ मे
द्यौश्च॑ म॒ इन्द्रश्च॑ मे
दिशश्च॑ म॒ इन्द्रश्च॑ मे
मूर्धा॑ च॒ म॒ इन्द्रश्च॑ मे
प्रजापतिश्च॑ म॒ इन्द्रश्च॑ मे॥[६]

अ॒ग॒श्नुश्च॑ मे

र॒श्मिश्च॑ मे॒ऽदा॒भ्यश्च॑ मे॒ऽधि॒पति॑श्च म
 उ॒पा॒गं॒शुश्च॑ मे॒ऽन्तर्या॑मश्च म
 ऐ॒न्द्र॒वा॒यव॑श्च मे
 मै॒त्रा॒व॒रु॒णश्च॑ म आ॒श्वि॒नश्च॑ मे
 प्र॒ति॒प्र॒स्थान॑श्च मे
 शु॒क्रश्च॑ मे म॒न्थी च॑ म आ॒ग्र॒य॒णश्च॑ मे
 वै॒श्व॒दे॒वश्च॑ मे ध्रु॒वश्च॑ मे
 वै॒श्वान॑रश्च म ऋ॒तु॒ग्र॒हाश्च॑ मे॒ऽति
 ग्रा॒ह्याश्च॑ म ऐ॒न्द्रा॒ग्नश्च॑ मे
 वै॒श्व॒दे॒वश्च॑ मे म॒रु॒त्व॒तीया॑श्च मे
 मा॒हे॒न्द्रश्च॑ म आ॒दि॒त्यश्च॑ मे
 सा॒वि॒त्रश्च॑ मे सा॒र॒स्व॒तश्च॑ मे
 पौ॒ष्णश्च॑ मे पा॒त्नी॒व॒तश्च॑ मे
 हा॒रि॒यो॒ज॒नश्च॑ मे॥[७]

इ॒ध्मश्च॑ मे॒ ब॒र्हिश्च॑ मे॒
वे॒दिश्च॑ मे॒ धि॒ष्णि॒याश्च॑ मे॒
सु॒चश्च॑ मे॒ च॒म॒साश्च॑ मे॒
ग्रा॒वा॒णश्च॑ मे॒ स्वर॑वश्च॒ म॒
उ॒पर॑वाश्च॒ मेऽधि॑षव॒णे च॑ मे॒
द्रो॒ण॒क॒ल॒शश्च॑ मे॒ वा॒य॒व्या॒नि च॑ मे॒
पू॒त॒भृ॒च्च॑ म॒ आ॒ध॒व॒नी॒यश्च॑ म॒
आ॒ग्नी॒ध्रं॑ च॒ मे॒ ह॒वि॒र्धा॒नं॑ च॒ मे॒
गृ॒हाश्च॑ मे॒ स॒दश्च॑ मे॒
पु॒रो॒डा॒शाश्च॑ मे॒ प॒च॒ताश्च॑ मे॒ऽव॒भृ॒थश्च॑ मे॒
स्व॒गा॒का॒रश्च॑ मे॥[८]

अ॒ग्निश्च॑ मे॒ घ॒र्मश्च॑ मे॒ऽर्क॑श्च॒ मे॒ सूर्य॑श्च॒ मे॒

प्रा॒णश्च॑ मे॒ऽश्व॑मे॒धश्च॑ मे
पृ॒थि॒वी च॑ मे॒ऽदि॒तिश्च॑ मे॒ दि॒तिश्च॑ मे
द्यौश्च॑ मे॒ श॒क्व॒वरी॑रङ्गु॒लयो॑ दि॒शश्च॑ मे
य॒ज्ञेन॑ क॒ल्पन्तां॑ ऋ॒क्च॑ मे॒ साम॑ च॒ मे
स्तो॒मश्च॑ मे॒ यजु॑श्च॒ मे
दी॒क्षा च॑ मे॒ तप॑श्च॒ म ऋ॒तुश्च॑ मे
व्र॒तं च॑ मे॒ऽहो॒रा॒त्रयो॑र् वृ॒ष्ट्या
बृ॒हद् रथ॑न्तरे च॒ मे य॒ज्ञेन॑ क॒ल्पेता॑म्॥[९]

गर्भा॑श्च॒ मे व॒थ्साश्च॑ मे
त्र्य॒विश्च॑ मे॒ त्र्य॒वी च॑ मे
दि॒त्यवा॑ट्च॒ मे दि॒त्यौही॑ च॒ मे
पञ्चा॑विश्च॒ मे पञ्चा॑वी च॒ मे
त्रि॒व॒थ्सश्च॑ मे॒ त्रि॒व॒त्सा च॑ मे

तुर्य॒वाट्च॑ मे॒ तुर्यो॑ही च॒ मे
प॒ष्ठवाट्च॑ मे॒ प॒ष्ठौही॑ च॒ म
उ॒क्षा च॑ मे॒ व॒शा च॑ म॒ ऋ॒षभ॑श्च॒ मे
वे॒ह॒च्च॑ मे॒ऽन॒ड्वा॒ञ्च॑ मे
धे॒नुश्च॑ म॒ आ॒युर् य॒ज्ञेन॑ क॒ल्पतां॑
प्रा॒णो य॒ज्ञेन॑ क॒ल्पतां॑ अ॒पानो॑ य॒ज्ञेन॑ क॒ल्पतां॑
व्या॒नो य॒ज्ञेन॑ क॒ल्पतां॑
चक्षु॑र्य॒ज्ञेन॑ क॒ल्पता॒ग् श्रो॑त्रं य॒ज्ञेन॑ क॒ल्पतां॑
म॒नो य॒ज्ञेन॑ क॒ल्पतां॑
वा॒ग्य॒ज्ञेन॑ क॒ल्पतां॑ आ॒त्मा य॒ज्ञेन॑ क॒ल्पतां॑ य॒ज्ञो य॒ज्ञेन॑ क॒ल्पता॑म्॥[१०]

एका॑ च॒ मे ति॒स्रश्च॑ मे
प॒ञ्च च॑ मे॒ स॒प्त च॑ मे
न॒व च॑ म॒ एका॑द॒श च॑ मे

त्रयो॑द॒श च॒ मे॒ पञ्च॑द॒श च॒ मे॒
 सप्त॑द॒श च॒ मे॒ नव॑द॒श च॒ म॒
 एक॑विं॒शतिश्च॒ मे॒ त्रयो॑विं॒शतिश्च॒ मे॒
 पञ्च॑विं॒शतिश्च॒ मे॒ सप्त॑विं॒शतिश्च॒ मे॒
 नव॑विं॒शतिश्च॒ म॒ एक॑त्रिं॒शच्च॒ मे॒
 त्रय॑स्त्रिं॒शच्च॒ मे॒
 चत॑स्रश्च॒ मे॒ ऽष्टौ॑ च॒ मे॒
 द्वा॑द॒श च॒ मे॒ षोड॑श च॒ मे॒
 विं॒शतिश्च॒ मे॒ चतु॑र्विं॒शतिश्च॒ मे॒
 ऽष्टा॑विं॒शतिश्च॒ मे॒
 द्वा॑त्रिं॒शच्च॒ मे॒ षट्त्रिं॒शच्च॒ मे॒
 चत्वारि॑ं॒शच्च॒ मे॒ चतु॑श्चत्वारिं॒शच्च॒ मे॒
 ऽष्टा॑चत्वारिं॒शच्च॒ मे॒
 वा॒जश्च॒ प्र॒स॒वश्चा॒पि॒जश्च॒ क्र॒तुश्च॒

सु॒वश्च॑ मू॒र्धा च॑
व्य॑श्नि॒यश्चा॑ऽऽन्त्या॒यनश्चा॑ऽन्त्यश्च॑
भौ॒वनश्च॑ भु॒वनश्चा॑ऽधि॒पतिश्च॑॥[११]

इ॒डा दे॒वहू॑र् म॒नुर् य॒ज्ञनी॑र्
बृ॒हस्प॑तिरु॒क्थाम॑द॒नि
श॒गंसि॑षद् वि॒श्वेदे॒वा स्सू॑क्त॒वाचः॑ पृ॒थिवि॑
मा॒तर्मा॑ मा॒ हि॒गंसी॑र्
म॒धु म॒निष्ये॑ म॒धु ज॒निष्ये॑
म॒धु व॒क्ष्यामि॑ म॒धु व॒दिष्यामि॑
म॒धुम॑तीं दे॒वेभ्यो॑
वा॒चमु॒द्यास॑गं शु॒श्रू॒षेण्यां॑
म॒नुष्ये॑भ्यस्तं मा॒ देवा॑ अ॒वन्तु॑
शो॒भायै॑ पि॒तरो॑ऽनु॒मद॑न्तु॥

ओं शान्ति॒ शान्ति॒ शान्तिः॑॥

---*---

This document is provided only as a convenience to promote interest in Vedas. For accuracy and correctness, Students/Beginners are requested to approach a Guru to learn the clear Pronunciation, Sandhi and Swaram.

The documents provided from <http://yajur.veda.tripod.com> must not be offered for download on other internet websites. These documents must not be used/embedded in any applications. These documents must be used for strictly non-commercial, personal and devotional purpose only.